

Liča z 1,2 milionomaj wjace

Nowa Ralbičanska pěstowarnja drje budže dróša hač planowane

Róžant (JK/SN). Hnydom na spočatku wčerawšeho posedženja gmejskeje rady Ralbicy-Róžant je radžičel Tomaš Bjeńš próstwu w změnu dnjoweho porjada stajil. Po jeho mjenjenju je trjeba, zo sej radžičeljo stworja přehlad wo tuchwilnych wudawkach za nowu Ralbičansku pěstowarnju, prjedy hač firmam nadawki přepodadža. Wšitke předležace poskitki firmow kalkulowane wysokosće přesahuja, z čimž hroža gmejnej negatiwne financelne wusutki. Tohodla měła so ra-

da na to dojednać, hač předležace poskitki přiwza a nadawki přepoda, abo hač nadawki znowa wupisa w nadžiji, zo dóńdu přijomniše poskitki. Přitomnej inženjeraj planowskeho běrowa pak so jasne za to wuprajišaj, nadawki přepodać, dokelž je tučasne jara ćežko, scyła firmy za předležace twarske a instalaciske džela namakać. Inženjerski běrow sam je firmy pozbudził, so na wupisanju wobdželić. Ale firmam pobrachuje personal, material a čas. Tohodla je gmejna mjenje abo

bóle zasudžena k tomu, poskitki firmow přiwzac a z nich te najlěpše wupytać. A te su daloko nad kalkulaciju. Znowa wupisać, by rěkało, čas zhubić a twar njedokónčić w planowanym času. Tohodla dojednachu so po dlějším wuradžowanju na to, nadawki přepodać a sej wot zamołwitych městnow w politice a hospodarskje dać wobkručić, zo je gmejna nuzowana, enormnje zwyżene wudawki zapłaćić. Nimo toho přepodachu radžičeljo wjesnjanosće Hubertusej Ryčerjej (nje-stronjan) nadawk, stajić próstwu pola wotpowědnych wuběrkow, zo so přidatne a wyše wudawki tež z 90 procentami spěchuja. Wšo druge by woznamjenjało, so njesměrnje zadolžić a přidatne wudawki z kreditami zarunać, štož njeje w zmysle gmejny a štož nichtó nochce.

Tak přepodachu nadawki we wobjimje 1,68 milionow eurow, a to za rošty, wokna a wonkownu fasadu, elektroinstalaciju, instalaciju tepjenja, instalaciju sanitarnych připrawow a přewětrjenje. Wosebje poskitk za wokna a fasadu bě nimale 60 procentow dróši hač wobličene. Kaž twarski nawoda radžičelam rjekny, liči w běhu twara z cyłkownje hač do 1,2 milionomaj eurow přidatnych wudawkow.



Twarska jama za nowotwar Ralbičanskeje pěstowarnje je nimale dopřihotowana. Přichodny tydzień nastaja tule kran, potom móža twarić.

Foto: Jan Kral